



Imprimatur

† Jānis Bulis

Rēzeknes – Aglyunas diecezes veiskups

2012. gada 3. majā

Sv. apostolu Filipa un Jākuba svātkūs

# RŪŽUKRŪŅS

*6. izdavums*

2015

RĒZEKNES – AGLYUNAS DIECEZES KŪRIJA



**Nu svātō pavesta Jōņa Pōvula II Apostoliskōs  
vēstules (2002. godā)  
veiskupim, goreidznīkim  
un ticeigajim par svātū rūžukrūni  
„ROSSARIUM VIRGINIS MARIAE”**

**Oktobris 2002 – oktobris 2003: Rūžukrūņa gods**

3. Pēc pōrdūmom Apostoliskajā vēstulē *Novo millennio ineunte*, kurā aicynōju Dīva tautu pēc jubilejas pīredzes „sōkt nu jauna ar Kristu”, jytu vajadzeibu atteisteit pōrdūmas par rūžukrūni, lai pamudynōtu kontemplēt Kristu jō Vyssvātōs Mōtes sabīdreibā un skūlā. Lyugtīs rūžukrūni nav nikas cyts, kai kontemplēt Jezu kūpā ar Mariju. Lai dareitu radzamōku itū pamudynōjumu, izmontojūt tū, ka tyvojās Leona XIII Enciklikas *Supremi apostulatus officio* 125. godadīnā, ilgojūs, lai itei lyugšona vysu godu īpašā veidā tyktu īteikta un lai tyktu parōdeita tōs vērteiba dažaidōs kristeigōs kūpīnōs. Tōdēļ pasludynoju itū laikapūsmu nu šō goda oktobra leidz 2003. goda oktobram par Rūžukrūņa godu.

Uztycu itū pastoralū nūrōdejumu atsevišķu Bazneicas kūpīnu iniciatīvai. Nagrybu, lai tys traucātu partikularūs Bazneicu pastorālūs planus, bet dreizōk kolpōtu tūs papyldynōšonai un pamatam. Kod teik atklōta rūžukrūņa piļņeiga nūzeime, tys vad uz pošu kristeigōs dzeives sirdi un dūd ikdīnišķu un augeigu goreigū un pedagogiskū spēju kontemplacijai, Dīva tautas formacijai un jaunajai evangelizacijai.

Lobprēt tū īsoku, ar pīrcu pīmynt vėl vīnu godadīnu: 40 godus nu Vatikana II Koncila sōkuma (1962. goda 11. oktobrī), „lelū žēlesteibu”, kaidu myusu laiku Bazneica sajēmuse nu Dīva Gora.

**4.** Uz taidas iniciativas napīcīšameibu nūrōda dažaidas refleksijas. Pymō skar steidzamu vajadzeibu stōtīs pretim zynomai krizei, kaida skōruse itū lyugšonu, kurai pošreizejā vēsturiskajā un teologiskajā kontekstā draud napamatōtas tōs vērtēibas samazynōšonai, un tōpēc tei reti teik īteikta jaunajai paaudzei. Daži uzskota, ka liturgijas centralōs vītas, kū pamatōti uzsvēris Vatikana II Koncils, naizbāgama konsekvence ir rūžukrūņa nūzeimes samazynōšona. Patīseibā, kai tū izskaidroj Pōvuls VI, itei lyugšona na tikai nanūsastōj pret liturgiju, bet ir tōs bolsts, jo labi tamā īvoda un kļūst par tōs atbolstu, ļaunūt tū pōrdzeivōt īkšejōs leidzdaleibas piļneibā un vōkt tōs augļus ikdīnas dzeivē.

Varbyut ir vėl taidi, kuri beistās, ka rūžukrūņs var izarōdeit moz ekumenisks, raugūtīs uz tō izteikti marianiskū raksturu. Patīseibā tys pīdar Dīvmōtes kulta vysteirōkajai perspektivai, kū nūrōdejis koncils: kulta, kas vērzeits uz kristeigōs ticeibas kristologiskū centru tai, „ka tod, kod gūdu sajem Mōte, ari Dāls (..) teik pazeits, mīļōts un pīlyugts pīnōceigā veidā”. Rūžukrūņs, nu jauna atklōts atteiceigā veidā, ir paleidzeiba, navys šķērslis ekumenismam!

## **Kontemplatīvō dzeive**

**5.** Tūmār vyssvareigōkais motīvs, lai spēceigi pamudynōtu lyugtīs rūžukrūnī, ir fakts, ka tys ir ļūti vēртеigs leidzeklis, kas labvēleigi ītekmej ticeīgūs kūpīnu uzajimt kristeīgō nūslāpuma kontemplēšonas pyules un kuru Apostoliskajā vēstulē *Novo millennio ineunte* nūrōdeju kai patīsu „svātuma pedagogiju”, kura pamatam jōbyut „kristīteibai, kas, pyrmom kōrtom, izaceļ ar lyugšonas mōkslu”. Kod myusdīnōs kulturā, nasaskotūt uz tik daudzom pretrunom, nu jauna rūnās goreiguma napīcīšameiba, mūdynōta ari cytu religiju ītekmē, vairōk nakai jebkod jōsasteidz aicynōt myusu kristeīgōs kūpīnas kļyut par „patīsom lyugšonas skūlom”.

Rūžukrūņš pīdar pi kristeīgōs kontemplācijas vyslobōkōs un vyspōrbaudeitōkōs tradīcijas. Atteisteits Rītumūs, tys ir tipiski meditativa lyugšona un atbylst „sirds lyugšonai” jeb „Jezus lyugšonai”, un ir izauguse Kristeīgūs Austrumu augsnē.

## **Lyugšona par mīru un gimini**

**6.** Zynomi vēsturiski apstōkli ir panōkuši, ka itys atgōdynōjums par rūžukrūņa lyugšonu kļyust īpaši aktuāls. Kai pyrmō ir steidzama napīcīšameiba saukt uz Dīvu pēc mīra dōvonas. Na vīnreiz vīn muni pīrkšgōjēji un es pats asam īteikuši rūžukrūnī kai lyugšonu par mīru. Tyukstūšgades sōkumā, kas īsasōka ar draudeigajim 11. septembra teroraktim un kurā ik dīnas daudzōs pasauļa daļōs rūnās jauni asiņaini un varmūceibas pylni tāli, atklōt

nu jauna rūžukrūni nūzeimoj īsadzilinōt tō nūslāpuma kontemplēšonā, kurs „ir myusu mīrs”, jo „obas ciļvēces daļas ir darejis par vasalumu, nūjaukdams myuri storp tom – īnaidu” (Ef 2,14). Tōdēļ, lyudzūtīs rūžukrūni, navar nasajust atbiļdeigam kolpōt mīra lītai ar īpašu attīksmi pret Jezus zemi, jūrūjom tai pīmaklātu, taču tik ļūti dōrgu kristīšu sirdej.

Vīnleidz steidzama napīcīšameiba pēc pyulem un lyugšonom pasarōda cytā myusu laiku kritiskajā punktā, kaida ir gimine, sabīdreibas šyuneņa, kū ideologiskajā un praktiskajā sferā aizvīn vairōk apdraud spāki, kuri mērkej tōs vīnōteibai un kuri mūdynoj bažas par šōs pamata un naatmatamōs institucijas nōkūtni, un leidz ar tū – par vysas sabīdreibas likteni. Atsagrīzšonai pi rūžukrūņa kristeigajōs giminēs gimīņu pastoralō dorba ītvorūs jōbyut sekmeigai paleidzeibai, lai nūvārstu šōs myusu laikmetam rakstureigōs krizes pūstūšu īdarbeibu.

### **Attīceigi papyldynōjumi**

**19.** Rūžukrūņs formā, kaida ir pījimta vysizplateitōkajā praktikā, kū apstyprynōjuse Bazneicas vara, nūrōda tikai uz dažim nu tik daudzajim Kristus dzeives nūslāpumim. Taidu izvēli diktēja šōs lyugšonas pyrmatnejō shema, kas tyka saisteita ar psalmu skaitu – 150.

Uzskotu tūmār, ka, lai atteisteitu rūžukrūņa kristologiskū temu, byutu attīceigi īvīst papyldynōjumu, kuri, atstōti atsevišku personu un kūpīnu izvēlej, ļautu aptvert ari Kristus publiskōs dzeives nūslāpumus nu kristeišonas Jordanā leidz cīsšonom. Teiši šymūs nūslāpumūs



kontemplejam svareigus Kristus Personas aspektus, kai tō kurs definitivi ir atklōjis Dīvu. Jys ir tys, kurs kristeibā pasludynōts par Tāva mīļotū Dālu, sludynoj Vaļsteibas atnōkšonu, līcynoj par tū ar sovīm dorbim, pasludynoj tōs praseibas. Teiši publiskōs dzeives laikā Kristus nūslāpums atsaklōj ar īpašu titulu kai gaismas nūslāpums: „Cikom asu pasaulē, Es asu pasaulā Gaisma.” (Jņ 9,5)

Pēc Kristus Īsamīsōšonas un apslāptōs dzeives nūslāpumu (prīceigi nūslāpumi) pīminēšonas un pyrms nakai apsastōt pi nōves cīsšonom (sōpeigī nūslāpumi) un augšanceļšonōs triumfa (gūdeibas nūslāpumi), ir attīceigi pōrdūmōt ari īpaši svareigus publiskōs dzeives momentus (gaismas nūslāpumi), lai rūžukrūni piļņeigōkā veidā varātu nūsaukt par „Evangelija kūpsavylkumu”. Šam papyldynōjumam ar jaunim nūslāpūmim, nimož natraucejūt nivīnam nu šōs lyugšonas strukturas tradicionalajim aspektim, jōpanōk, ka tei tiks pōrdzeivōta kristeigajā goreigumā ar jaunu interesi kai patīss īvods Jezus Sirds dziļumā, pūkā un gaismas, sōpu un gūdeibas okeanā.

### **Prīceigī nūslāpumi**

**20.** Pymū cilku – „prīceigūs nūslāpumus” – pateišam raksturoj pūk, kas storoj nu Īsamīsōšonas nūtykuma. Tys ir radzams nu pasludynōšonas breiža, kod Gabrielā sveičņš Jaunovai nu Nazaretēs saistōs ar mesianiskō pūkā saucīni: „Prīcojīs, Marija”. Šymā pasludynōjumā sovu mērki sasnēdz vysa pesteišonas un pat vysa pasaulā vēsture. Jo jau Tāva plans ir vysu apvīnōt Kristū (sal. Ef 1,10), tod kaut kaidā veidā vysu pasauli sasnēdz Dīva žāļsirdeiba, ar

kaidu Tāvs nūsalīc pōr Mariju, lai dareitu jū par sova Dāla Mōti. Vysu ciļvēci aptver šis *fiat* – „lai nūteik” –, ar kuru jei gataveibā atbiļd Dīva gribai.

Zam pīka zeimes ir ari tikšonōs ar Elizabeti, kurā pošas Marijas bolss un Kristus klōtbyutne jōs klēpī dora, ka Jōņs „pīceigi sasakustēja” (sal. Lk 1,44). Pīka bogōta ir aina nu Betlemes, kurā Dīviškō Bārna, pasauļa Pesteitōja, pīdzimšonu eņgeli dzīd un pasludynoj teiši kai „lelu pīcu” (Lk 2,10).

Taču jau divi pādejī nūslāpumi, kaut sagloboj pīka nūkrōsu, izsoka ari dramatisma īzeimes. Jo upurēšona templī, paužūt pīcu par konsekraciju un nūvadūt leidz aizgrōbteibai sērmgaļvi Simeonu, ītver ari pravītōjumu par „pretōšonōs zeimi”, kaida šis Bārns byus Izraeļam, kai ari par zūbynu, kurs caurdūrs Mōtes dvēseli (sal. Lk 2,34–35). Pīceigs, bet vīnlaiceigi dramatisks ir ari stōsts par divpadsmītgadeigū Jezu svētneicā. Jys šeit pasarōda sovā Dīviškajā gudreibā un pamatōti kai Tys, kurs „mōca”. Jymā atsaklōj Dāla nūslāpums, Dāla kurs piļneibā atsadevis Tāva lītom. Šei atklōsme paredz evangelisku radikalismu, kas Vaļsteibas bezīrunu praseibu pīškā izīt pat ōrpus ciļvēciskajom saiknem. Pat Jezups un Marija, satraukti un namīreigi, „nasaprota tū, kū Jys tim saceja” (Lk 2,50).

Pōrdūmōt „pīceigūs nūslāpumus” nūzeimōj īt kristeigō pīka pādejā motivacijā un dziļajā nūzeimē. Tys nūzeimōj īsalyukōt Īsamīsōšonas nūslāpuma konkreiteibā un pesteišonu nasūšū cīsšonu naskaidrajā pasludynōjumā. Marija paleidz mums saprast, kur slēpēs kristeigō pīka nūslāpums, atgōdynojūt mums, ka kristeiba vyspyrms ir *euhangelion*,

„prīceigō vēsts”, kuras centrs un pat vyss saturs ir Kristus, Vārda, kurs klīva mīsa, Persona, vīneigais pasauļa Pesteitōjs.

### **Gaismas nūslāpumi (*mysteria lucis*)**

**21.** Pōrejūt nu bērneibas un dzeives Nacaretē pi Jezus publiskōs dzeives, kontemplacija aizvad myusus pi tim nūslāpumim, kurus ar īpašu titulu var nūsaukt par „gaismas nūslāpumim”. Patīseibā vyss Kristus nūslāpums ir gaisma. Jys ir „pasauļa Gaisma” (Jņ 8, 12). Tūmār šis aspekts īpaši pasarōda publiskōs dzeives godūs, kod Jys sludynoj Vaļsteibas Evangeliju. Ilgojūtīs nūrōdeit kristeigajai kūpīnai pīcus nūzeimeigus Kristus dzeives šōs fazes breižus, „gaismas pylnus” nūslāpumus, uzskotu, ka pamatōti par taidim var tikt atzeiti: 1. Jō kristeiba Jordanā, 2. Sevis atklōšona kōzōs Kanā, 3. Dīva Vaļsteibas sludynōšona un aicynōjums atsagrīzt, 4. Pōrsaveidōšona Tabora kolnā, 5. Euharistijas īdybynōšona, kas ir Leldīnas nūslāpuma sakrāmēntala izpaušme.

Kotrs nu šim nūslāpumim atklōj Vaļsteibu, kura jau ir atnōkuse poša Jezus Personā. Vyspyrms, gaismas nūslāpums ir kristeiba Jordanā. Šeit, kod Jezus nūnōk pi yudiņa – kai navaineigais, kurs padora sevi par „grāku” myusu dēļ (sal. 2 Kor 5, 21) – atsaver dabasi un Tāva bolss pasludynoj jū par sovu meiļōtū Dālu (sal. Mt 3,17), bet Svātais Gors nūnōk pōr jū, lai aicynōtu nōkamajai misijai. Gaismas nūslāpums ir zeimu sōkums Kanā (sal. Jņ 2, 10 – 12), kod Kristus, pasateicūt Marijas, pyrmōs storp ticeigajim,

intervencei, pōrvārsdams yudini veinā, atver mōcekļu sirdis ticeibai. Gaismas nūslāpums ir Jezus mōceiba, kuras laikā Jys sludynoj Dīva Vaļsteibas atnōkšonu un aicynoj atsagrīzt (sal. Mk 1, 15), atlaižūt grākus tim, kuri Jam tyvojās paļōveibā (sal Mk 2,3–13; Lk 7,47–48), dūdūt īsōkumu zāļsirdeibas nūslāpumam, kuru Jys pats realizēs leidz pat pasaulā golam, īpaši caur Bazneicai uztycātū izleigšonas sakramentu. Gaismas nūslāpums pylnā šō vōrda nūzeimē ir pōrsaveidōšona, kas saskaņā ar tradiciju nūtyka Tabora kolnā. Dīviškō gūdeiba apgaismoj Kristus vaigu, kod Tāvs jū atzeist aizgrōbtūs apostolu prīškā, aicynoj jam klauseit (sal. Lk 9, 35) un sagatavoj pōrdzeivōt leidz ar Jū cīsšonu sōpeigū breidi, lai kūpā ar Jū nūnōktu leidz augšanceļšonōs prīcai un Svātō Gora pōrveidōtai dzeivei. Vysbeidzūt, gaismas nūslāpums ir Euharistijas īdybynōšona, kurā Kristus ar sovu Mīsu un Asni zam maizes un veina zeimem kļyust par bareibu, snādzūt „leidz golam” līceibu sovai mīlesteibai uz cylvākim (Jņ 13), kuru pešteišonai saliks pats sevi upurī.

Šymūs nūslāpumūs, izjamūt Kanu, Marijas klōtbyutne palīk apslāpta. Evangeliji tikai dažas reizes pīmiņ jōs klōtbyutni vīnā voi ūtrā Kristus mōceibas breidī (sal. Mk 3,31–35; Jņ 2,12), un nikas narunoj, ka jei bejuse Pādejūs Vakareņu telpā Euharistijas īdybynōšonas laikā. Tūmār lūma, kaidu jei pylda Kanā, kaut kaidā veidā ir radzama vysā Kristus ceļā. Atklōsmi, kaidu kristeibas breidī Jordanā teišā veidā deve par jū Tāvs un kura kai atbolss atskanēja Jōnī Kristeitōjā, Kanā atrūnam uz Marijas lyupom, un tei kļyust par lelu mōtiškū atgōdynōjumu, kū jei adresej vysu

laiku Bazneicai: „Dorit vysu, kū jys jums saceis.” (Jņ 2, 5) Tys ir atgōdynōjums, kas labi īvoda Kristus publiskōs dzeives vōrdūs un zeimēs, veidojūt marianisku pamatu vysim „gaismas nūslāpumim”.

### **Cīsšonas jeb sōpeigī nūslāpumi**

**22.** Kristus cīsšonu nūslāpumim evangeliji veļtej lelu uzmaneibu. Kristeigō dīvbejeiba vīnmār, īpaši Lelajā gavēnī ar krystaceļu, pōrdūmojūt atseviškus cīsšonu breižus, intuitivi jytūt, ka šeit ir mīlesteibas atklōsmes kulminācijas punkts un ka šeit ir myusu pesteišonas olūts. Rūžukrūņš izavēlej zynomus cīsšonu breižus, aicynojūt tū kurs lyudzās, sakūpōt uz tim sovas sirds skatīni un pōrdzeivōt tūs arvīn nu jauna. Meditācijas ceļu atver Olivdōrzs, kur Kristus pīdzeivoj īpaši mūkūšus breižus Tāva grybas prīškā, kod vōjō mīsa varātu ļautīs pretesteibas kārdynōjumam. Tī Kristus nūsastōj vysu ciļvēces kārdynōjumu un vysu tōs grāku prīškā, lai pasaceitu Tāvam: „Na muns, bet Tovs prōts lai nūteik.” (Lk 22,42) Šis jō „jā” izdzēš pyrmvacōku „nā” Edenes dōrzā. Bet cik gon jam moksōja šōs Tāva grybas pījimšona! Tys izrīt nu nōkamajim nūslāpumim, kurūs caur šausteišonu, krūņōšonu ar ērškim, krysta nesšonu un nōvi uz krysta Jys teik atdūts vyslelōkajam pazamōjumam: *Ecce homo!*

Šymā pazamōjumā atsaklōj na tikai Dīva mīlesteiba, bet ari poša cylvāka nūzeime. *Ecce homo*: kas grib pazeit cylvāku, tam jōprūt atpazeit tō nūzeimi, olūtu un pīpiļdejumu Kristū – Dīvā, kurs pasazamoj aiz mīlesteibas „laidz pat nōvei, leidz par nōvei uz krysta” (Flp 2,8).

Cīššonu nūslāpumi nu jauna īvoda ticeīgūs Jezus nōves pōrdzeivōjumā, lik nūsastōt zam krysta leidza Marijai, lai kūpā ar jū īnērtu Dīva mīlesteibas uz cylvāku okeanā un sajustu vysu tōs atjaunojūšū spāku.

### **Gūdeibas nūslāpumi**

**23.** „Kristus vaiga kontemplacija nadreikst apstastōt pi Krystā Systō tāla. Kristus ir augšancēlīs!” Rūžukrūņš vīnmār ir paudis šū ticeibas pīredzi, aicynojuūt ticeīgū izīt ōrpus cīššonu tymsas, lai vārstu skotu uz Kristus gūdeibu augšanceļšonā un debeskōpšonā. Kontemplejūt Augšancālušū, kristīts nu jauna atklōj sovas ticeibas motivus (sal. 1 Kor 15, 14) un pōrdzeivoj otkon na tikai tūs prīcu, kurim Kristus pasarōdeja apostolu, Magdalenas, mōcekļu nu Emaus, bet ari Marijas prīcu, kurai na mozōk intensīvi vajadzēja pīredzēt mīļōtō Dāla jaunū dzeivi. Šamā gūdeībā, kurā nu debesīs uzkōpšonas breiža Kristus sēd pi Tāva lobōs rūkas, ari jei tiks īcalta leidz ar debesīs uzjimšonas breidi, lai anticipātu (lat. *anticipare* – īprīkš sajimt, īprīkš baudeit, apsteigt) tū, kas sagatavōts vysim taisneigajim caur mīsas augšanceļšonūs. Vysbeidzūt, krūņōta gūdeībā – jei mirdz kai eņgeļu un svātūs Karalīne, Bazneicas eshatologiskōs realitates anticipacija un vērsūtne.

Dāla un Mōtes gūdeibas ceļa centrā rūžukrūņš trešajā gūdeibas nūslāpumā nūlik Vosorsvātkus, kuri parōda Bazneicu kai gimini, kas puļcejusēs kūpā ar Mariju, dzeivynōtu ar Svāto Gora varenū dvasmu un gotovu evangelizācijas misijai. Itai, taipat kai cytu gūdeibas nūslāpumu, kontemplacijai jōvad

ticeigī uz arvīn dzeivōku sovas jaunōs dzeives apziņu, dzeives Kristū, Bazneicas īkšejā realitatē – dzeives, kurai Vosorsvātku aina ir lela „ikona”. Tōdēļ gūdeibas nūslāpumi atdzeivynoju ticeigajūs tū eshatologiskū beigu cereibu, uz kurom tī tīcās kai caur vēsturi svātceļojūšōs Dīva tautas lūcekli. Tam jōmudynoju jūs drūsmeigi līcynōt par šū „prīceigū vēsti”, kura pīšķir jāgu vysai jūs dzeivei.

### **Dīva vōrda klauseišonōs**

**30.** Lai pīškērtu meditacijai biblisku pamatu un lelōku dziļumu, ir labi, jo pēc nūslāpuma nūsaukšonas nūlosa pīmārōtu Beibeles tekstu, kurs, atkareibā nu apstōklīm, var byut eisōks voi garōks. Cytī vōrdi nikod nav tik īdarbeigi kai īdvasmōtais Vōrds. Tū jōklausōs ar pōrlīceibu, ka tys ir Dīva Vōrds, izteikts šudiņ un „dēļ manis”. (..)

### **Klusēšona**

**31.** Klauseišonūs un meditaciju baroj klusēšona. Ir attīceigi pēc nūslāpuma nūsaukšonas un Vōrda proklamācijas atbylstūšu laiku apsastōt un sasakūpōt uz pōrdūmojamū nūslāpumu, pyrms sōcam lyugšonu vōrdus. Nu jauna atklōta klusuma vērteiba ir vīns nu kontemplācijas un meditācijas praktizeišonas nūslāpumim. (..) Skaitūt rūžukrūni, pēc Dīva Vōrda nūsaklauseišonas ir attīceigi īvārōt eisu pauzi, kuras laikā gors sasakūpoj uz konkretō nūslāpuma saturu.

**Desmit „Esi sveicynōta, Marija”**

**33.** (..) „Esi sveicynōta Marija” centrs storp pyrmū un ūtrū daļu ir vārds Jezus. Breižim, steigā lyudzūtīs, itys centrs nateik īvārōts, un leidz ar tū – Kristus nūslāpums, kas teik kontemplāts. Taču teiši akcents, kaidis teik lykts uz Jezus vōrdu un jō nūslāpumu, īzeimoj rūžukrūņa dereigu un augleigu lyugšonu. Jau Pōvuls VI Adhortacijā *Marialis cultus* atgōdynōja par zynomūs regionūs praktizeitū īrodumu: pasvītrojūt Kristus vōrdu, pīvīnōt tam refrenu (tai sauktōs „pībiļdes”) saisteibā ar apdūojamū nūslāpumu.

Šis ir uzslavas cīneigs īrodums, īpaši kod rūžukrūņs teik skaiteits publiski. Tys labi pauž kristologiskū ticeibu (..) un paleidz meditacijā. (..)

**„Gūds lai ir Tāvam”**

**34.** Trinitarō doksologija ir kristeigōs kontemplācijas mērķis. Jo Kristus ir ceļš, kurs vad myusus Gorā pi Tāva. Kod leidz golam turimēs uz šō „ceļa”, pastōveigi nūstājā treju Dīviškū Personu nūslāpuma prīškā, kurom pīnōk slava, gūds un pateiceiba. Ir svareigi, lai „Gūds lai ir Tāvam” kontemplācijas vērsūtne, rūžukrūnī tyktu dareita labi radzama. Lyudzūtīs publiski, tū var dzīdēt, lai attīceigi uzsvārtu šū strukturalū perspektivu, kas raksturoj kotru kristeigū lyugšonu. Taidā mārā (..) Vyssvātōs Trejadeibas pagūdynōšona kotras desmites nūslāgumā natiks reducāta leidz eisa nūslāguma lūmai. (..)



### **Nūslāguma šautru akts**

**35.** Saskaņā ar vespōreji pījīmtu praktiku rūžukrūnī pēc trinitarōs doksologijas teik skaiteits šautru akts, dažāids, atkareibā nu īrodumim. Nūvērtejtūt taidu invocaciju vērteibu, jōpīzeimoj, ka nūslāpumu kontemplācijas augleiba byus lobōk izteikta, jo tiks gōdōts par tū, lai kotru nūslāpumu nūslāgtu ar lyugšonu par konkretō nūslāpuma specifiskim auglim. Taidā veidā rūžukrūņš varēs trōpeigōk paust savu saisteibu ar kristeigū dzeivi. (..)

### **Īsōkums un nūslāgums**

**37.** (..) Rūžukrūņa lyugšona nūsaslādz ar lyugšonu pavesta intencijōs, lai tai vērzeitu lyudzūšō skatīni uz Bazneicas vajadzēibu plašū horizontu. Un teiši ar dūmu, lai pamudynōtu uz rūžukrūņa šaidu eklezialu viziju, Bazneica ir tū bogōtynōjuse ar svātajom atlaidom dēļ tim, kuri tū lyudzās attīceigajā dispozicijā. (..)

### **Izkōrtōjums laikā**

**38.** Rūžukrūni var lyugtīs ik dīnas piļneibā. (..) Saskaņā ar pošreizejū praktiku pyrmūdīna un catūrtūdīna veļteitas „prīceigajim nūslāpumim”, ūtardīna un pīktdīna – „cīsšonu nūslāpumim”, trešdīna, sastdīna un svātdīna – „gūdeibas nūslāpumim”. Kur lai īkļāun „gaismas nūslāpumus”? Apsverūt, ka „gūdeibas nūslāpumi” atsakōrtoj divas dīnas pēc kōrtas, sastdīnā un svātdīnā, bet sastdīna tradicionāli ir dīna ar spēceigu marianisku nūkrōsu, līkāš attīceigi pōrceļt uz sastdīnu nedeļas „prīceigū nūslāpumu” ūtrū apdūmōšonu, kurūs ir izteikta Marijas klōtbyutne. Catūrtūdīna tai palīk breiva teiši „gaismas nūslāpumu” meditacijai. (..)

**Gimine: vacōki...**

**41.** (..) Lyudzu vysus tūs, kuri nūsadorboj ar gimiņu pastoraciju, ar pōrlīceibu pamudynōt tōs lyugtīs rūžukrūnī.

Gimine, kura lyudzās vīnōteibā, vīnōta palīk. Svātais rūžukrūņš saskaņā ar senu tradīciju ir lyugšona, kas īpaši veicynoj gimines sasapūļceišonu. (..)

**... un bārni**

**42.** (..) Rūžukrūņa lyugšona par bārnim, bet vēļ vairōk – kūpā ar bārnim, (..) snādz goreigu paleidzeibu, kuru nadreikst nycynōt. Var rastīs bažas, ka rūžukrūņš nazalīk myusdīnu bārnu un jaunīšu gaumem pīmārōts. Varbyut tūmār šis breidynōjums bolstōs rūžukrūņa pavēršā skateišonā. Beigu beigōs, jo vīn saglobojam rūžukrūņa pamatstrukturu, nikas natraucej bārnim un jaunīšim tō skateišonu – kai giminē, tai ari grupōs – bogōtynōt ar attīceigim simboliskim un praktiskim elementim, kuri paleidzātu tū izprast un nūvērtēt. (..)

**Rūžukrūņš – dōrgums, kuru napīcīšams atklōt**

**43.** Dōrgī brōli un mōsas! Tik vīgla, bet vīnlaikus tik bogōta lyugšona pateišam ir peļnejuse, lai kristeigō kūpīna tū nu jauna atklōtu. (..)

Īpaši grīžūs pi Jums, dōrgī brōli veiskupi, prīsteri un diakoni, kai ari pi Jums, kas pyldot dažaidus kolpōjumus pastoralajā laukā, lai Jjus, nu personeigōs pīredzes īpazeistūt rūžukrūņa skaistumu, kļyutu dedzeigi tō promotori. (..)

Es lyukojūs uz jums vysim, vysu kōrtu brōli un mōsas, uz jums, kristeigōs gimines, uz jums sliminīki un sērmgaļvi, uz jums, jaunī: paļōveibā jemit otkon rūkōs rūžukrūņa zeileites, atklōjūt šū lyugšonu nu jauna Svātūs Rokstu gaismā, harmonijā ar liturgiju, ikdīnas dzeives kontekstā.

(..) Sova Pontifikata divdemit pīktō goda īsōkumā uztycūt šū Apostoliskū vēstuli Jaunovas Marijas maigajom rūkom, gorā zamojūtīs jōs svātbiļdes pīškā breiniškeigajā sanktuarijā, kū jai uzcēle svēteigais Bartolomejs Longo, rūžukrūņa apostols. Labprōt izsoku jō aizkustynojūšūs vōrdus, ar kaidim jys nūslādz slovonū Supliku Svātō Rūžukrūņa Karalīnei:

*„Ak, Marijas svēteitais rūžukrūņ,  
soldō kēde, kas saisti myusus ar Dīvu;  
mīlesteibas saite, kura vīnoj myusus ar eņgelim;  
tūrņs, kas paglōb nu eļnes uzbrukumim;  
drūšō ūsta jyuras katastrofā!  
Nikod vairs tevi naatmessim!  
Tu byusi mums mīrynōjums nōves stuņdē.  
Tevī ir dzīstūšōs dzeiveibas pādejais skupsts.  
Bet myusu lyupu pādejais akcents  
byus Tovs soldais vōrds,  
ak, Rūžukrūņa Karalīne nu Pompejas,  
ak, myusu dōrgō Mōte,  
ak, grēcīnīku Glōbēja,  
ak, Vaļdneica,  
ak, nūmōktūs Mīrynōtōja.  
Esi vīnmār slaveita, šudiņ un vīnmār,  
uz zemes un dabasūs.”*

**Pavests Jōns Pōvuls II**

Vatikanā, 2002. goda 16. oktobrī

## RŪŽUKRŪNS

Dīvs ir pīškeiris Marijai īpašu lūmu pesteišonas vēsturē. Jei ar sovu *fiat* pīsadola cylvāka pesteišonas realizacijā. Marija runoj ar Dīvu un apzynōti pīkreit jō planam. Jei dzili tic un paklausa. Marija atsaklōj kai pyrmō jaunōs dereibas ticeigō, kai Mōte un kai paraugs ticeigajim Bazneicā. Jei ir vīna nu mums. Marija, byudama Bazneicas attāls, rōda šai Bazneicai ticeibas ceļu, kas izapauž sevis atdūšonā, uzticēšonā un paļōveibā Dīvam. Marija ir dzeiva mōceiba par Dīva žēlesteibas nūslāpumu.

Mīlesteibas Dīvs, Tu esi darejis Jaunovu Mariju par svēteigu storp vysom sīvītem un vysom tautom, atjaunoj myusūs ticeibu Tovam Dālam, paſīsam Dīvam un paſīsam cylvākam, un mōci mums pasateikt par sajimtū pesteišonu. Caur Kristu, myusu Kungu. Amen.

### Šō rūžukrūņa N. daļu upurēsīm:

- ✧ par tim, kuri uzticējuši sevi myusu lyugšonom;
- ✧ par vysim, kuri mōcōs, studej, lai jī labi izmontōtu Svātō Gora dōvōtū gudreibas dōvonu;
- ✧ par bārnim, lai vacōki, skūla un atbiļdeigōs īstōdes ryupātūs gon par jūs materialu uzturēšonu, gon goreigū audzynōšonu;
- ✧ par tim, kuri dzeivoj nabadzeibā un vīnkōršeibā un labprōt paleidz cytim;
- ✧ par tim, kuri uzatic Dīva Žāļsirdeibai un gaida pīdūšonu;
- ✧ par tim, kuri jytās nalaiimeigi, kurim dzeivē nasaveic;
- ✧ par Dzeivō rūžukrūņa puļceņa daleibnīkim, lai jī vēļ dedzeigōk lyugtūs gon kūpīnā, gon privati;
- ✧ par bārnim un jaunīšim, lai jī mīļōtu rūžukrūņa lyugšonu;

- ✧ par sadarynōtajim, lai sagatavōšonōs laikā Lauleibas sakramenta pījimšonai jī izaturātu vīns pret ūtru ar cīnu un mīlesteibu;
- ✧ par ministrantim, kuri kolpoj pi oltora, lai jī byutu paraugs sovim vīnaudžim;
- ✧ par vysim, kuri bogōtynoj dīvkolpōjumu ar sovu dzīdōjumu;
- ✧ par vacim, slimim, vīntulim cylvākim;
- ✧ par vōjas ticeibas cylvākim, kuri naredz dzeives jāgu, lai jī nasalyzutu gryutā breidī, bet maklātu Dīva paleidzeibu;
- ✧ par tim, kuri natic Dīvam un nikod nasalyudz, lai jī īsaklausa sovas sirdsapziņas bolsā;
- ✧ par tim, kuri cīš nu dažaidom atkareibom: alkoholisma, narkomanijas u. c., lai ar Dīva paleidzeibu jī tyktu glōbti;
- ✧ par nadzymušajim bērnim, lai jim vysim byutu ļauts īnōkt šymā pasaulī;
- ✧ par pavestu, veiskupim, prīsterim, Goreigō seminara audzēknim un par aicynōjumim uz goreigū kōrtu;
- ✧ par tim, kuri mōca un audzynoj bārnus un jaunīšus;
- ✧ par mīru pasaulī;
- ✧ par Latviju, lai tī, kuri ir atbiļdeigi par myusu valsti, vadeitu myusu tautu gudri un taisneigi;
- ✧ par misiju dorbu, lai pasaulī arvīn tyktu sludynōts Kristus Evangelijs;
- ✧ par tim, kuri gatavojās sajimt Kristeibas sakramentu;
- ✧ par tim, kuri gatavojās pyrmajai grāksyudzei un pyrmajai svātajai komunijai;
- ✧ par tim, kuri gatavojās sajimt Īstyprynōšonas sakramentu;
- ✧ par masu informācijas leidzekļu darbinīkim, lai jī paleidzātu izaplateit patīseibai un lobajam;
- ✧ par tim, kuri stōv izvēles prīškā, lai jī pīmiņ, ka vyssvareigōkais ir Dīvs;

- ✧ par laulotajim, lai storp jim vaļdeitu sovstarpejas sapratnes, pīdūšonas un mīlesteibas gors;
- ✧ par tim, kuri atsarūn materiali voi goreigi gryutā situacijā;
- ✧ par mērstūšajim;
- ✧ par dvēselem škeisteitovā.

**Tāvs myusu**, kas esi debesīs, svēteits lai tūp Tovs vārds, lai atnōk Tova vaļsteiba, Tova vaļa lai nūteik kai debesīs, tai ari vērs zemes. Myusu ikdīniškū maizi dūd mums šudiņ un atlaid mums myusu porōdus, kai ari mes atlaižam sovim porōdnīkim, un naīved myusus kārdynōšonā, bet atpestej myusus nu ļauna. Amen.

**Esi sveicynōta, Marija**, žēlesteibas pylnō, Kungs ir ar tevi; tu esi svēteita storp sīvītem, un svēteits ir tovas mīsas auglis Jezus. Svātō Marija, Dīva Mōte, lyudzīs par mums, grēcinīkim, tagad un myusu nōves stuņdē. Amen.

**Gūds lai ir Tāvam** un Dālam, un Svātajam Goram, kai beja nu īsōkuma, tai tagad un vysod, un myužeigi myužam. Amen.

### **Pēc kotra rūžukrūņa nūslāpuma:**

*Tāvs myusu...,*

*10 Esi sveicynōta, Marija...,*

*Gūds lai ir Tāvam...,*

V. Marija, bez īdzyntō grāka ījimtō,

R. Lyudz par mums, kas steidzamēs pi Tevis.

***Privati lyudzūfīs, var pīvīnōt:***

Muns Jezu, atļaid mums myusu vaines, pasorgoj myusus nu eļnes guņs un aizved vysas dvēseles uz dabasim, it seviški tōs, kurom vysvairōk vajadzeiga Tova žāļsirdeiba.

## PYRMŌ DAĻA - PRĪCEIGŌ

### Pyrmais nūslāpums EŅĢEĻA SLUDYNŌJUMS JAUNOVAI MARIJAI



Dīvs syuteja eņģeli Gabrieli uz Galilejas piļsātu, kas saucēs Nacarete, pi Jaunovas, kas beja sadarynōta Davida cilts veiram, kam vōrds beja Jezups; un Jaunovas vōrds beja Marija. Un eņģeļs, īnōcis pi jōs, saceja: "Esi sveicynōta, žēlesteibas pynō! Kungs ir ar tevi; tu esi svēteita storp sīvītem. Lyuk, tu ījimsi un dzemdēsi Dālu un nūsauksi jū vōrdā Jezus." (Sal. Lk 1,26-31)



## Ūtrais nūslāpums MARIJA APMEKLEJ SV. ELIZABETI



Marija, tamōs dīnōs cālusēs, steigšus aizgōja kolnūs, jūdu piļsātā. Un jei, īgōjuse Zaharija nomā, sveicynōja Elizabeti. Un nūtyka, ka Elizabetei, Marijas sveicynōšonu dzēržūt, bērneņš prīceigi sasakustēja jōs mīsōs un Elizabeti pīpiļdeja Svātais Gors; un jei skaļā bolsā sauce un saceja: „Tu esi svēteita storp sīvītem, un svēteits ir tovas mīsas auglis!” (Sal. Lk 1,39-42)

## Trešais nūslāpums BETLEMES STALEITĪ PĪDZYMST JEZUS



Jezups nu Nacaretas piļsātas Galilejā nūgōja Judejā, Davida piļsātā, kas saucēs Betleme, tōpēc ka jys beja nu Davida noma un ciļts, lai pīsaraksteitu ar Mariju, sovu sadarynōtū, kas beja mōtes cereibōs. Un nūtyka, ka, jīm tī asūt, pīnōce laiks, lai jei dzemdeitu. Un jei dzemdeja sovu pyrmdzymtū Dālu un ītyna jū auteņūs, un īlyka jū silē, jo tim nabeja vītas mōjvītā. (Sal. Lk 1,4-7)

## Catūrtais nūslāpums BĀRNA JEZUS UPURĒŠONA TEMPLĪ



Kod beja pagōjušas Mozus Lykumā nūteiktōs jūs škeisteišonōs dīnas, vacōki nese Jezu uz Jeruzalemi, lai jū stōdeitu Kungam prīškā.

Un, lyuk, Jeruzalemē beja cylvāks, vōrdā Simeons. Nu Svātō Gora jys beja sajēmis atklōsmi, ka jys naredzēs nōves, pyrms nabyus uzlykōjis Kunga Svaideitū. Jys pajēme Bārnu sovōs rūkōs, slaveja Dīvu un saceja: „Munas acis ir skatejušas Tovu pesteišonu, kū Tu sagatavōji vysu tautu prīškā: gaismu pogōnu apgaismōšonai un slavu sovai Izraeļa tautai.” (Sal. Lk 2)

## Piktais nūslāpums BĀRNA JEZUS ATRASŠONA SVĒTNEICĀ



Jezups un Marija, kod Jezus beja divpadsmit godus vacs, pēc svātku ģoduma gōja uz Jeruzalemi. Un, kod jī, izabeidzūt svātku dīnom, atsagrīze atpakaļ, Bārns Jezus palyka Jeruzalemē, bet jō vacōki Tū nazynōja. Un tī, naatroduši jū, atsagrīze Jeruzalemē, tū maklādami. Un nūtyka, ka pēc trejom dīnom tī jū atroda sēžam svētneicā storp Rokstu mōceitōjim, jimūs klausūtīs un jautojūt. Un vysi, kas jū dzērdēja, beja pōrsteigti par jō gudreibu un atbiļdem. (Sal. Lk 2,42- 46)

## ŪTRŌ DAĻA – GAISMAS

### Pyrmais nūslāpums JĒZUS KRISTEIBA JORDANĀ



Jezus atnōce nu Galilejas uz Jordanu pi Jōņa, lai tys jū kristeitu.

Pēc kristeibas Jezus tyuleņ izkōpe nu yudiņa, un, lyuk, dabasi atsavēre, un jys redzēja Dīva Goru bolūža veidā nūsalaižam uz sevi. Un lyuk, bolss nu dabasim saceja: „Šis ir muns meilais Dāls, kurs maņ ļūti pateik.” (Sal. Mt 3)


## Ūtrais nūslāpums JEZUS ATSAKLŌŠONA KŌZŌS KANĀ



Un trešajā dīnā Galilejas Kanā beja kōzas, un, kod pītryuka veina, Jezus Mōte saceja Jezum: „Jim nav veina.” Bet Jezus jai atbiļdēja: „Vēļ muna stuņde nav pīnōkuse!” Jō Mōte saceja apkolpōtōjim: „Dorit vysu, kū jys jums saceis.” Jezus saceja jim: „Pīpiļdit traukus ar yudini!” Un jī tūs pīpiļdeja leidz molom. Kod goldzinis nūgaršōja yudini, tys beja pōrvārsts veinā, un jys saceja leigavaiņam: „Ikvīns cylvāks vyspyrms pasnādz lobū veinu, bet tu taupeji lobū veinu leidz šam.”

Šū sōkumu breinumim Jezus dareja Galilejas Kanā, atklōdams sovu gūdeibu, un jō mōcekli ticējam jam. (Sal. Jņ 2)


**Trešais nūslāpums**  
**DĪVA VAĻSTEIBAS SLUDYNŌŠONA UN**  
**AICYNŌJUMS ATSAGRĪZT**



Un Jezus saceja: „Laiks pīsapīldejis, un Dīva vaļsteiba tyvu klōt! Gondorit par grākim un ticit Evangelijam!” (Sal. Mk 1)

Jezus izdzīdynōja trīkas slymū, saceidams: „Dāls, tovi grāki tev teik atlaisti! (..) Celīs, jem sovu gultu un ej sovōs mōjōs!” Un tys tyuleņ cēlēs un, gultu pajēmis, aizgōja, vysim radzūt, tai, ka vysi breinōjōs un gūdynōja Dīvu, saceidami: „Tū mes vēļ nikod naasam redzējuši.” (Sal. Mk 2,5; 11-12)

## Catūrtais nūslāpums PŌRSAVEIDŌŠONA TABORA KOLNĀ



Jezus jēme leidza Pīteri, Jākubu un Jōni un uzkōpe kolnā, lai lyugtu Dīvu. Un jō sejas izskots kliva cytaidōks, un jō apgērbs topa bolts un storōja. Un, lyuk, divi veiri sasarunōja ar jū; tī beja Mozus un Elija. Jī pasarōdeja gūdeibā; un tī runōja par jō gola nūrisi, kū jys pīpiļdeis Jeruzalemē.

Bet Pīters un tī, kas atsaroda pi jō, beja mīga nūmōkti; un uzamūduši tī redzēja jō gūdeibu un divus veirus, stōvūt pi jō. Un Pīters saceja Jezum: „Mōceitōj, mums ir labi ite byut; mes taiseisim trejs tel̄tis: vīnu Tev, vīnu Mozum un vīnu Elijam.”

Jim tai runojūt, pasarōdeja mōkūņs un apānōja jūs. Un bolss atskanēja padebesī, saceidams: „Šys ir muns meilais Dāls, jū klausit!” (Sal. Lk 9, 28-35)



## Piktais nūslāpums EUHARISTIJAS ĪDYBYNŌŠONA



Pyrms Leldīnu svātkim Jezus, zynōdams, ka jō stuņde atnōkuse, lai nu šō pasaulā aizītu pi Tāva, mīļōdams sovejūs, kas beja pasaulī, mīļōja tūs leidz golam. (Jņ 13, 1)

Un Jezus, jim ādūt, pajēme maizi, svēteja tū, lauze, deve jim un saceja: „Jemit, šei ir muna Mīsa.” Un jys jēme bikeri, pasateice un deve jim; un tī dzēre nu tō. Un Jys tim saceja: „Šys ir muns jaunōs dereibas Asnis, kas par daudzim tiks izlīts.” (Mk 14, 22-24)

**TREŠŌ DAĻA – SŌPEIGŌ****Pyrmais nūslāpums  
KUNGS JEZUS LYUDZĀS OLIVDŌRZĀ**

Jēzus, ceļus nūsametis, lyudze Dīvu, saceidams:  
„Tāvs, jo Tu vēlejīs, atjem šū bikeri nu manis! Tūmār na  
muns, bet Tavs prōts lai nūteik!” Un jys, nōves baiļu  
pōrjimts, lyudze Dīvu jō korstōk. Un jō svīdri klīva kai  
ašņa lases, kas pilēja zemē. (Sal. Lk 22,41-44)

## Ūtrais nūslāpums KUNGS JEZUS TEIK ŠAUSTEITS



Pilats otkon uzrunōja jū un saceja: „Kū tod jyus gribit, lai es doru ar jūdu Kēneņu?” Bet tī otkon klīdze: „Sit jū krystā!” Un Pilats, grybādams ļaudim iztapt, atlaide tim Barabu, bet Jezu šausteja un nūdeve, lai jū systu krystā. (Sal. Mk 15,12-15)

**Trešais nūslāpums  
KUNGAM JEZUM GOLVĀ  
UZLĪK ĒRŠKU KRŪNI**



Un karaveiri, nūpynuši krūni nu ērškim, lyka tū Jezum golvā un nīdri lobajā rūkā. Un tī, jō prīškā ceļūs masdamīs, izsmēja jū, saceidami: „Esi sveicynōts, jūdu Kēneņ!” (Sal. Mt 27,29)

**Catūrtais nūslāpums**  
**KUNGA JEZUS CEĻŠ UZ GOLGOTU**




Un Jezus, nasdams savu krystu, gōja uz tū vītu,  
kas saucēs Golvaskausa vīta, bet ebrejiski Golgota.  
(Sal. Jņ 19,17)

**Pīktais nūslāpums**  
**JEZU PĪNOGLOJ PI KRYSTA,**  
**UN JYS MĒRST ŠAUSMEIGŌS CĪŠŠONŌS**



Un, kod jī nūnōce vītā, kas saucās Kalvarija voi Golgota, jī tur syta Jezu un slapkovas krystā: vīnu pa labi, ūtru pa kreisi. Un tys beja ap sastū stuņdi, un tynsa īsastōja leidz pat deveitajai stuņdei. Un saule tyka aptymsōta, un pīrkšcors svētneicā pōrpleisa vydā pušu. Un Jezus sauce skaļā bolsā, saceidams: „Tāvs, Tovōs rūkōs es atdūdu sovu goru!” Un jys, tū saceidams, izdvese goru. (Sal. Lk 23,33.44-46)

**CATŪRTŌ DAĻA – GŪDEIBAS****Pyrmais nūslāpums  
KUNGS JEZUS AUGŠANCEĻĀS**

Enģeļs uzrunōja sīvītes un saceja: „Nasabeistit, jo es zynu, ka jyus meklejat Jezu, krysta systu. Jō šeit nav, jo jys ir augšancēlīs, kai beja sacejis. Nōcit un aplyukojit tū vītu, kur Kungs beja nulykts!” (Sal. Mt 28,5-6)

## Ūtrais nūslāpums KUNGS JEZUS UZKŌP DABASŪS



Kungs Jezus pēc tam, kod ar mōceklim beja runōjis, uzkōpe dabasūs un sēd pi Dīva lobōs rūkas. Bet jī gōja un sludynōja vysur; un Kungs jim paleidzēja un mōceibu apstyprynōja ar leidzejšom zeimem. (Mk 16, 19-20)



**Trešais nūslāpums**  
**SVĀTAIS GORS NŪSALAIŽ PŌR**  
**JAUNOVU MARIJU UN APOSTOLIM**



Kod Vosorsvātku dīna beja pīnōkuse, pīpeši nu dabasim nōce ryukūņa, it kai stypra vēja pyusma, un pīpiļdeja vysu mōju, kur sēdēja Vysusvātō Jaunova Marija un apostoli. Un pasarōdeja it kai guņs mēles, kas sasadaleja un nūsalaide uz ikvīna nu jim. Un vysi tyka Svātō Gora pīpiļdeiti. (Sal. Apd 2,1-4)

**Catūrtais nūslāpums**  
**VYSUSVĀTŌ JAUNOVA MARIJA**  
**AR MĪSU UN DVĒSELI TEIK UZJIMTA DABASŪS**



Vysuvareigais, myužeigais Dīvs, Tu bezvaineigōs Jaunovas Marijas, Tova Dāla Mōtes, mīsu un dvēseli pajēmi dabasu gūdeibā, dori, lai mes pastōveigi ryupātūs par goreigajim lobumim un nūpeļņeitu sev leidzdaleibu jōs gūdeibā. („Romās Mīsale”)

**Piktais nūslāpums**  
**MARIJA TEIK KRŪŅŌTA PAR DABASU**  
**UN ZEMES KARALĪNI**



Tod pi dabasim pasarōdeja lela zeime: saulē tārpta sīvīte un mēness zam jōs kōjom, bet jai golvā divpadsmit zvaigžņu krūšs. (Atkl 12,1)

**Es tycu** uz Dīvu,  
vysuvareigū Tāvu,  
dabasu un zemes Radeitōju;  
un uz Jezu Kristu,  
jō vīneigū Dālu,  
myusu Kungu,  
kas ir ģimts nu Svātō Gora,  
pīdzimis nu Jaunovas Marijas,  
cītis zam Poncija Pilata,  
krystā pīkolts, nūmiris un apglobōts,  
nūkōpis eļņē;  
trešajā dīnā augšancēlīs nu myrušajim;  
uzkōpis dabasūs,  
sēd pi Dīva, vysuvareigō Tāva,  
lobōs rūkas,  
nu kurīnes jys atnōks  
tīsōt dzeivūs un myrušūs.  
Es tycu uz Svātū Goru,  
svātū katōliskū Bazneicu,  
svātūs sadraudzeibu,  
grāku atlaisšonu,  
mīsas augšanceļšonūs  
un myužēigū dzeivōšonu. Amen.

**LITANIJA**  
**VYSUSVĀTŌKŌS JAUNOVAS MARIJAS GŪDAM**

Kyrie, eleison!  
Christe, eleison!  
Kyrie, eleison!  
Kristu, klausī myus!  
Kristu, uzklausī myus!  
Dīvs Tāvs nu dabasim, apsažāloj par mums!  
Dīvs Dāls, pasaūļa Pesteitōj,  
apsažāloj par mums!  
Dīvs Svātais Gors, apsažāloj par mums!  
Svātō Trejadeiba, vīns Dīvs,  
apsažāloj par mums!

Svātō Marija,  
Svātō Dīva Dzemdeitōja,  
Svātō jaunovu Jaunova,  
Jezus Kristus Mōte,  
Bazneicas Mōte,  
Dīva žēlesteibas Mōte,  
Vysuteirōkō Mōte,  
Vysuškeistōkō Mōte,  
Nanūzīdzeigō Mōte,  
Vysod jaunaveigō Mōte,  
Mīleigō Mōte,  
Breineigō Mōte,  
Loba padūma Mōte,  
Radeitōja Mōte,

Iyudz Dīvu par mums!

Pesteitāja Mōte,  
Vysugudrōkō Jaunova,  
Gūda cīneigō Jaunova,  
Slavejamō Jaunova,  
Vareigō Jaunova,  
Žēleigō Jaunova,  
Uzticeigō Jaunova,  
Taisneibas spūguļs,  
Gudreibas krāslys,  
Myusu prīcas īmeslis,  
Goreigais trauks,  
Cīnejamais trauks,  
Sevišķs dīvakolpōšonas trauks,  
Goreigō rūze,  
Davida tūrnis,  
Zylūņkaula tūrnis,  
Zalta noms,  
Dereibas skreine,  
Dabasu durovas,  
Reita zvaigzne,  
Sliminīku veseleiba,  
Grēcinīku glōbēja,  
Bēdeigūs īprīcynōtāja,  
Kristticeigūs paleigs,  
Eņgeļu Kēnenīne,  
Patriarhu Kēnenīne,

lyudz Dīvu par mums!

Pravīšu Kēnenīne,  
 Apostolu Kēnenīne,  
     Mūcekļu Kēnenīne,  
     Izzinēju Kēnenīne,  
 Jaunovu Kēnenīne,  
 Vysu Svātūs Kēnenīne,  
     Bez pyrmdzymtō grāka ģjimtō Kēnenīne,  
     Dabasūs uzjimtō Kēnenīne,  
 Svātō Rūžukrūņa Kēnenīne,  
 Gimiņu Kēnenīne,  
     Mīra Kēnenīne,  
     Mōras zemes Kēnenīne,

lyudz Dīvu par mums!

Dīva Jārs, kas nūceļ pasauļa grākus,  
     atļaid mums, Kungs un Dīvs!  
 Dīva Jārs, kas nūceļ pasauļa grākus,  
     uzklausi myus, Kungs un Dīvs!  
 Dīva Jārs, kas nūceļ pasauļa grākus,  
     apsažāloj par mums!

**ZAM TOVA PATVĀRUMA** steidzamēs, svātō  
 Dīva Dzemdeitōja! Myusu lyugšonas, lyudzam,  
 nasmōdej myusu vajadzeibōs! Bet nu ikvīnas nalaimes  
 vysod myus izglōb, slaveigō un svēteigō Jaunova!  
 Myusu Vaļdneica, myusu Vydutōja, myusu  
 Aizbyldynōtōja! Samīrynoj myus ar sovu Dālu! Īteic  
 myus sovam Dālam! Stōdi myus sovam Dālam prīškā!

**V.** Lyudzīs par mums, svatō Dīva Dzemdeitōja!

**R.** Lai mes Kristus apsūlejamu toptu cīneigi!

### **Lyugsimēs!**

Kungs Dīvs, mes Tevi lyudzam, dori, lai myusu, Tovu kolpu, dvēsele un mīsa vīnmār byutu vasala un ar slavejamōs Vysusvātōkōs Jaunovas Marijas aizbiļdeibu mes tyktu atbreivōti nu laiceigō ļaunuma un prīcōtūs myužeigā dzeivē. Caur Jezu Kristu, myusu Kungu. Amen.

## **VEĻTEIŠONĀS VYSUSV. J. MARIJAS BEZVAINEIGAJAI SIRDEI**

(publiski var laseit Dīvamōtes svātkūs un mēneša I sastdīnōs)

Vysusvātōkō Jaunova, myusu Kunga Jezus Kristus Mōte, mes īpašā veidā veļtejam sevi Tovai Bezvaineigajai Sirdei.

Ar šū veļteišonūs mes atjaunojam kristeibas svātsūlejumus un saskaņā ar Evangeliju uzajamam pīnōkumu īkšeji atsagrīst, atsaraiseit nu patmīleibas un nu lātas pīkōpeibas pasaulei, lai mes byutu piļneigi Tovā reiceibā, vysod pyldūt dabasu Tāva grybu.

Bez tam mes uzticim Tev, Vysulobō Mōte, sovu kristeigū aicynōjumu. Mes gribim veidōt sovu dzeivi tai, kai Tu vēlejš: gondareišonas un lyugšonas gorā. Mes gribim ar dedzeibu pīsadaleit svātajā Mises Upurī,



apostoliski dorbētīs, ik dīnas dīvbejeigi skaiteit rūžukrūni un - atbylstūši Evangelijam - prīceigi nest dzeives upurus, byut spējeigim atsateikt un gondareit. Mes gribim byut kristeigūs tykumu un škeisteibas paraugs pasaulei.

Mes apsūlom byut uzticeigi Svātajam tāvam un vīnmār byut vīnōti kūpā ar jō veiskupim un prīsterim. Tovā Mōtes vadeibā un aizsardzeibā mes gribim byut apostoli, lai veicynōtu tik napīcīšamū lyugšonas un mīlesteibas kūpeibu ar pavestu, kas ir Bazneicas mōceitōjs un gons. Mes lyudzam Tevi, Bazneicas Mōte, snēgt jam sovu īpašū aizsardzeibu.

Taipat mes Tev apsūlom lyugtīs par vysom dvēselem, vest cylvākus pi Tevis un pamudynōt jūs uz Tovas Sirds gūdynōšonu. Tai kai ļaunums un grāks pōrplyudynoj pasauli, mes ar paļōveibu paceļam skotu uz Tevi, žāļsirdeigō Mōte, un lyudzam glōbt vysus sovus bārnus. Tu, žēleigō un laipnō, Vysusvātōkō Jaunova Marija!

**LYUGŠONA SV. JEZUPAM**

Pi Tevis, svātais Jezup, mes steidzamēs sovōs bādōs, un, Tovas Vysusvātōkōs Leigovas paleidzeibu pīsaukuši, ari Tovas aizbiļdeibas lyudzam. Tōs mīlesteibas dēļ, kas Tevi vīnōja ar bezvaineigū Jaunovu, Dīva Dzemdeitōju, un tōs tēviškōs gōdeibas dēļ, ar kaidu Tu ryupējīs par Bērneņu Jezu, mes Tevi pazemeigi lyudzam, pasaver žēleigi uz montōjumu, kas atpērkt ar Kristus Kunga Asni, un myusu vajadzeibōs paleidzi mums ar sovu spēceigū pōrstōvnīceibu. Sorgoj, ryupeigais Svātōs gimines sorgs, izradzātūs Jezus Kristus bārnus, izglōb myusus, vysudōrgōkais Tāvs, nu ikvīnas sasamaitōšonas un moldim, styprynoj myusus, vysuceņteigōkais Aizbiļdni, ar debeseigu spāku šymā karā pret timseibas goru. Un kai cytkōrt Tu izglōbi Bērneņu Jezu nu jam draudūšom brīsmom, tai ari tagad sorgoj svātū Dīva Bazneicu nu īnaindīku uzbrukumim un ikvīnas nalaimes! Uzjem myusus vysus sovā pastōveigā patvārumā, lai mes, pēc Tova parauga dzeivōdami un Tovas paleidzeibas styprynōti, varātu dīvbejeigi dzeivōt, svēteigi nūmērt un īmontōt myužēigū līgsmeibu debesīs. Amen.

**LYUGŠONA SVĀTŌ TĀVA NŪDŪMĀ**

(rūžukrūņa nūslāgumā)

Sovūs lāmumūs naizdybynojamais Tāvs,  
kurs sovu kolpu, myusu pavestu N., esi īcēlis par  
vyspōrejōs Bazneicas gonu,  
pazemeigi Tevi lyudzam,  
dōvoj jam napīcīšamōs žēlesteibas,  
lai jys izpiļdeitu Tovus nūdūmus  
Bazneicā un pasaulē.  
Styprynoj jō apostoliskū dedzeibu,  
lai tai pa vysu zemi tyktu pagūdynōts  
Tovs svātais Vōrds.  
Pastōveigi vairoj jō mīlesteibu uz Tevi un cylvākim,  
lai caur jō kolpōjumu Bazneicā  
tyvynōtūs un nūstasyrynōtu Tova Vaļsteiba,  
bet vysu cylvāku sirdis  
pasakļautu Tovai svātajai grybai.  
Dabasu Tāvs,  
dori, lai pavesta aicynōjums pījimt  
Kristu un jō mīlesteibu  
vastu tautas uz vīnōteibu,  
bet sovstarpeja pīdūšona  
nastu pasaulei Tovū žāļsirdeibu.  
Meilais Dīvs,  
pazemeibā un paļōveibā mes lyudzam šū žēlesteibu,  
vīnōti ar Jezus Mōti,  
Mōras zemes Karalīni. Amen.

## Rūž'krūņa svātū Karalīni...

Rūž'krūņa svātū Karalīni teiksim,  
Dīvmōti cālū pazemeigi sveiksim.

Tu - myusu glōbīņš (2 reizes)

Dzeives baigā vātrā,

Jaunova Vyssvātō!

Vyskrōšņō Rūze, debess dōrzā zīdi,

Ar sovu smaržu pošu Dīvu saisti.

Tu - Dīva breinums (2 reizes),

Kas mirdz Viņa varā,

Myusu Mōte meilō!

Cik jauks ir krūnis,

Peits nu lyugsnu rūzem,

Nu Tāvareizem, Esi sveicynōta...

It vysu pōrspēj (2 reizes)

Rūžukrūņa dyžums,

Nu tō nōk vyss lobums!

Ar tū mes Dīvu, Viņa Mōti teicam,

Kas grākoj - glōbam,

Kas dus kopā - leidzam.

Šū svātū krūni (2 reizes)

Dominiks mums snēdze,

Debess bolvu deve!

Un četrōs daļōs rūžukrūni dolom,

Dīvmōtes, Jezus dzeivi, dorbus ceram.

Tod Svātūs Rokstus (2 reizes)

Dīvbejeigi losom,

Rūžukrūņ' kod skaitom!

Bez šaubom ticēt, mīļot ļūti kvāli  
 Un cerēt stypri, dzeivot mīrā drūši.  
 Tū vysu gyunam (2 reizes),  
 Dīva Mōti teicūt,  
 Rūžukrūni skaitūt.

Rūž'krūņa svātō saimes plašōs, dyžōs –  
 Mums, Debess Mōte, brōli, mōsas meilōs.  
 Rūž'krūni meilit, rūž'krūni skaitit,  
 Svēteibu tys ness mums,  
 Dzeivē, nōvē leidzēs!

**RŪŽUKRŪŅA DAĻU SADALEJUMS  
 PA NEDEĻAS DĪNOM**

*Pyrmūdīn* – *Prīceigō daļa*  
*Ūtardīn* – *Sōpeigō daļa*  
*Trešdīn* – *Gūdeibas daļa*  
*Catūrtdīn* – *Gaismas daļa*  
*Pīktīn* – *Sōpeigō daļa*  
*Sastdīn* – *Prīceigō daļa*  
*Svātdīn* – *Gūdeibas daļa*



## SATURA RĪDEITĪJS

<i>ROSARIUM VIRGINIS MARIAE</i> .....	5
Rūžukrūņš.....	20
Pirmā daļa – Prīceigō .....	24
Ūtrā daļa – Gaismas .....	29
Trešā daļa – Sōpeigō .....	34
Catūrtā daļa – Gūdeibas .....	39
Es tycu .....	44
Litanija V. J. Marijas gūdam.....	45
Veļteišonōs V. J. Marijas Bezv. Sirdei .....	48
Lyugšona sv. Jezupam .....	50
Lyugšona Svātō tāva nūdūmā .....	51
Rūž'krūņa svātu Karalīni .....	52

**ISBN 9984-19-256-3**

**Latgales Druka**  
**TIPOGRĀFIJA UN REPRO CENTRS**

Rēzekne, Baznīcas iela 28, LV-4601